




Ty-Anne y su buladeifi

Skirbi pa: Yesenia Farro-Arends

Ilustracion: Yesenia Farro-Arends



E storia aki a pasa den realidad.
Pasobra Ty-Anne ta un mucha cu ta gusta lesa,
e kier comparti su storia cu tur mucha.

Danki pa e inspiracion Tante Ann.

Autor : Yesenia Farro-Arends
Prome edicion : Noord, Augustus 2013

Copyright 2013 Yesenia Farro-Arends

Ilustracion : Yesenia Farro-Arends
Coreccion : Ramon Todd Dandaré

No ta permiti pa reproduci, copia, ni transmiti ningun parti di
e buki aki sin autorisacion por escrito di e autor.



Un biaha tawata tin un famia buladeifi cu nan neishi masha halto den un palo di coco.

Mama Buladeifi tawata tin dos yiu.

Un dia diripiente a supla un biento masha duro y un di e yiunan a cay for di e neishi.

Como cu e no por a bula ainda, e mama no por a bay cu ne pa e subi bek na e neishi.

E mama buladeifi a bira masha tristo mes, pasobra e no sa ken ta bay cuida su yiu p'e.

No mucho leu di e neishi tawata biba un mucha cu yama Ty-Anne.

E ta un mucha cu ta stima tur sorto di bestia y semper el a bisa su mama cu e tawata tin gana di cuida un parha chikito.

Ty-Anne a haya un sorpresa grandi, ora cu su mama a trece e yiu buladeifi p'e.

El a stim'e masha hopi mes y el a yam'e Jewel.





Hunto cu su mama Ty-Anne a traha un neishi nobo pa Jewel den un caha di sapato.

Jewel a keda masha contento mes cu su neishi nobo.

E mama buladeifi a yama Ty-Anne hopi danki pa cuida su yiu p'e y asina e aventura di Ty-Anne cu Jewel a cuminsa.

Tur caminda Jewel mester a bay cu ne, te hasta den auto!

Cada rato Jewel ta haya hamber; e ora ey e ta habri su pik bati su halanan pa pidi cuminda.

Ty-Anne tawata cri'e cu pan muha y papa di baby.

Ora Ty-Anne mester bay scol, Jewel tawata keda cerca Ty-Anne su mama.

Asina el a cuminsa crece y poco poco tur su plumanan a cuminsa sali.

Ty-Anne cu Jewel a bira bon amiga; tur caminda nan tawata compaña otro.





No a dura mucho cu Ty-Anne mester a cambia su neishi pa uno mas grandi.

E biaha aki el a busca un caha di appel bashi na supermercado. Jewel a haya hopi pluma y ya el a cuminsa sali di su neishi pa purba bula.

Keto bay e ta come y cada rato Ty-Anne mester haci su neishi limpi.

Jewel a crece mas y mas y e tempo a yega pa e cuminsa bay pafo pa custuma cu tur loke un buladeifi ta haci: cana busca simia den santo, hunga den awasero y bula cu e otro parhanan.

Ty-Anne a cuminsa bira nervioso, pasobra un djis Jewel lo bula bay lag'e.

E lo bay cerca su mama buladeifi bek y tambe cerca tur su amigonan buladeifi.





Tur mainta bon trempan Ty-Anne ta lanta masha contento.

Asina cu e caba di come, e ta cria Jewel prome cu e prepara pa bay scol.

Awo si Jewel ta keda cas.

E ta bay hunga pafo den e palo di mispel.

Tanten, e ta warda Ty-Anne yega for di scol pa sigui cuid'ele.

E no ta bula bay.

Un dia, ora cu Ty-Anne a yega bek for di scol, el a bay busca Jewel pafo den e palo di mispel.

Pero Jewel tawata perdi, e no por a hay'e niun caminda.

Ty-Anne a bira masha tristo y el a puntra su mama ta pakico Jewel a bay.

Su mama a bis'e pa no preocupa, cu Jewel su mama buladeifi a bin busc'e, pero mas atardi Jewel lo bin bek.





Asina Ty-Anne a keda warda Jewel.

Cada rato e ta bay wak si e ta mir'e pafo den e palo di mispel, pero nada di Jewel.

Ora solo ta casi baha, ainda Jewel no a yega.

Ty-Anne ta corda con Jewel ta drumi den su cas, riba e lampi di nan sala.

Ay cu el a haya falta di Jewel!; e lo bin bek?

Ty-Anne a bay drumi tristo tristo: ta unda Jewel lo a keda?

El a corda con el a hay'e chikito chikito..., con el a cri'e, hunga cu ne, dun'e sunchi, y con e tawata para riba su man...

El a pega soño y el a soña cu e ta bula halto halto hunto cu Jewel!

E tawata stima Jewel masha hopi mes, e no tawata kier pa e bay.





Su siguiente mainta, prome cu el a come, el a core bay wak si Jewel tawata t'ey.

Pero, atrobe, Jewel no tawata t'ey.

El a bay scol ta pensa so.

Ora scol a caba, cu el a bin cas bek, el a haya un sorpresa masha grandi mes!

Jewel a bin bek... y e no ta su so..., el a haya un amigo!

Ty-Anne a bira masha contento atrobe, su Jewel a haya un amigo buladeifi.

Awo si Jewel ta cla pa bay: e sa bula, e ta come y bebe su so, y e tin un amigo pa compañ'e pafo.

E ta mes grandi cu su mama buladeifi.

Ty-Anne ta tristo, pero toch contento alabes.

Berdad Jewel ta cla pa bay, pero e sa cu e ta bay cerca su mama buladeifi y su amigo den e mata di mispel.

Jewel ta hopi contento cu Ty-Anne a yud'ele ora e tawata chikito.

E ta bay haya su falta sigur!





Alafin, Jewel a bin para riba Ty-Anne su schouder pa saca un bunita potret.

Asina Ty-Anne por keda cord'e pa semper. Despues el a bula bay pafo cerca su mama buladeifi y su amigo.

Ty-Anne a bis'e ayo y el a disparce den e mata di mispel.

Tin biaha Ty-Anne ta mir'e pafo y e ta cumind'e, y Jewel ta bati su halanan pa cumind'e bek.

Nan lo no lubida otro nunca mas!